

# OberflächeGoofe

## Einzug

Mer send d'OberfläckeGoofe.  
Singed, was das Joahr esch gloffe.

## What about Kangaroos?


Melodie: s'Zündhölzli (Mani Matter)

Ha mini Flogscham überwonde  
ond ben of Australie gfloge,  
de letschti Koalabär go luege  
ond be dänn bis of Sidney zoge.  
Blieb grad bis Silvester det.  
Be eus häts jo eh kei Schnee.  
Aber s'Füürwerk hani  
weg em Waldbrand-Rauch ned gseh.

Zom sech sälber es Bild mache  
vo de Buschbrand-Situation,  
chond no d'Greta hindenoche  
ond zwar – s'esch e Sensation -  
of 'me Solar-Tesla-Impuls  
Protone-Quantum-Flug-Mobil;

zwar erscht nächscht Joahr  
aber sone Geeschte zählt hald vell.

Langsam reise jo in Ehre  
aber wänns wörkli pressiert,  
wells als Läbige cha go,  
wird doch lieber importiert.  
Ob per Schiff oder per Flug  
hauptsach Schotzmaske muesch ha -  
Corona-Virus inklusive: Made in China.



## Does it fit?

Melodie: Hemmige (Mani Matter)

Bad Zurzach, Baldige ond Böbike,  
Kaiserstuhl, Rekinge ond Riete,  
Rümike ond Wislike no debi:  
So muess s'Neu Zurzach si.

So fusioniere bringt eim vell Vorteil.  
Grossi Gmeinde händ emol meh Style.  
Ond well sie of de Charte breiter send,  
Patrouille-Suisse sie au findt.

→ Ouuu !!! Melike !



## It's not cricket

Melodie: Schnappi, das kleine Krokodil  
(Iris Gruttmann)

De ganzi Sommer badet sie im Rhi  
Ond händ au emmer s'Schwömminsi debi.  
Die Einhorn-Mode wänd mer grad weder bräche  
Ond jaged sie z'Rekinge in Räche.


Ri-Ra-Räche för einigi wird's knapp.  
Ri-Ra-Räche d'Einhörner nämed ab.

Ond d'Einhörner, wos dänn no hät im Rhi,  
die schni schna schnappe mer eus gli.  
Mer gönd is Seetal – da esch de Plan -  
ond bstelled eus för nächscht Joahr en Kaiman.

→ Wels funktioniert!

Schni-Schna-Schnappi  
Schnappi, Schnappi schnapp  
Schni-SchnaSchnappi, d'Einhörner nämet ab.

Schni-Schna-Schnappi  
Schnappi, Schnappi schnapp  
Schni-Schna-Schnappi, d'Einhörner nämet ab.



## To cut corners

Melodie: Genforscher (Guz)



Beträchtlis Misstroue und Beförchtige  
gets bezöglich 5G-Antenne.  
Mäschte werded ufgröschtet, doch ich froge me:  
Wo wänds mit neue Antenne he.

Zwar wänd all meh Netz, und schneller muess es  
si.  
Aber d'Strahligsquelle  
wott niemert vor d' Nase hi.  
Drom esch d'Standortsuechi vornherein för Katz.  
Debi wüsstet mer Goofe ein geeignete Platz.

Wit weg vo dim Hüslü mitem Gartezweg  
hättis jetz doch Platz in Mühleberg.

## Spruch

Mini Zahstellig esch so schief,  
dass esch ned zum lache!  
Die müesst mer met sonere Chlammere  
i di richtig Rechtig mache.  
Wänni eini ide Brocki fänd,  
wörd mis Budget för sie lange.  
Han d'Brocki ufgsuecht,  
gfonde hani aber nor ä Spange.



## Shaken, not stirred

Melodie: Grätli (Pfannestil Chammer Sexdeet)

Das esch jetzt ebe sones Grätli,  
wo fremdi Mächt be eus düend mache.  
Es esch es cheibe gäbiges Grätli.  
Es cha verschiedenigi Sache (*mache*).

Wett eine über öpper rüssle,  
dänn chan er die Botschaft verschlüssle.  
Well läse chamer, was do innegod  
nor wo die Schüssle stod.  
Egal was mer dor die Maschine triebt,  
mer weiss, dass das allne verborge bleibt.  
Aber ebe, weg dem Gheimberich  
lest's d'CIA hald glich.

Das esch jetzt ebe ned das Greetli,  
wos Flüge unbeliebt wett mache.  
Nei, es esch eifach nor äs Grätli,  
wo andri Lüt chan überwache.

Dezue chas Text - wo niemert verstod -  
Ond wo mer dur das Grätli durelod  
Verändere - ond das esch schnell passiert  
Do stunsch garantiert.

Zum Beispiel lömmer Goofe ebe jetzt  
dur das Grätli en ganz flache Witz,  
Dass en - mer wössed sälber ned wies god  
au en Fläckegeist verstod.

## Damsel in distress

Melodie: Männer sind Schweine (die Ärzte)

Am Fernseh läuft Tschutte min Schatz.  
Es häd nor Fraue ofem Platz.  
Me cha säge i eusre Ziit  
esch d'Emanzipation scho wit.

Hilf im Hushalt bruchet's kei.  
Fraue chönd alls ganz ellei.  
Andersch wär's jo jammerhaft.  
Nome well de Maa Vollzit schafft.

Näb de Familie cha sie au  
en Arbet ha, di hötig Frau.  
Ond das fascht zo glichem Salär,  
wie wänn d'Vulva es Schnäbi wär.

**Alle:** Immer meh Fraue im Parlament!

**M:** Ich frog mech, was die no alles wänd.

**F:** Fraue tüend streike.

**F:** Mer händ nonig alls erreicht.

**M:** Ehr werded nie im stoh seiche.

**F:** Hauptsach esch, dass mer preicht.

**M:** Muetterschaftsurlaub för eus

**M:** wär för eus Manne öpis neus.

**F:** Jo, Chind becho esch jo ned schwer.

**F:** Ond mer chöntet dänn is Militär.

**F:** För e Frauequote ide Metallindustrie!

**M:** Ond mer wänd jede Monet zickig si.

**Alle:** Lod sech das ned löse?

**Alle:** Secher ned Rucki zucki!

**M:** Wer send jetzt weder die Böse?

→ de Orlik, de Wicki, de Stucki!



## Political Correction

Melodie: Missverständnis (Mani Matter)

Die Grüene, die händ es paar Sitzli gwunne.  
Ond meined jetzt schiin ihne ewig d'Sunne.  
Sie wänd en Bundesrot  
ond will das niemert rafft,  
Kandidieret's dänk als nächschts för  
d'Wältherrschaft

--- Mer trinked nochli Tee...

In Bundesbern hät d'SP Fädre glo.



A eri Spitze sött - öper neus cho.  
Was mached all die Lüt,  
wo s'Mandat verlore händ?  
Die werded eifach alli Präsident?  
--- Mer trinked nochli Tee...

En neue Präsident suecht d'SVP.  
Well de Rösti, de häts langsam gseh.  
Wähled kein alte Sack  
ond au kein junge Porscht  
--- Velecht sogar e Frau!

Hauptsach esch, s'werd ned weder e Worscht.

## Meghxit, isn't it

Melodie: God save the Queen (umstritten)

Die Eu ist ein Verein,  
Will ganz Europa sein.  
Doch das ischt sie nöd.

Weh Dir Helvetia,  
En Rahmevertrag muesch ha.  
Wie chönntsch das dorezieh?  
D'Britte wössted wie.

D'Meghan ond de Harry  
gönd bim Birchmeier verbi,  
froget, was Schloss Zurzi choscht  
Er verschauft's ned - bigoscht.

Meghan, Harry, Archie  
Müend noimet andersch hi.  
Weg vom Königrich.

De Archie esch not amused.  
Wer luegt em dänn bis er pfluusd?  
För Kitaplätz muess mer wit.  
S'Urgrosi hät kei Zit.

S'esch skandalös,  
s'esch bodebö, s'esch schuderbar  
Aber s'esch wahr.

